



Inatsisartunut ilaasortaq  
Laura Táunâjik Uitsatikitseq  
Siumut

**§ 37 naapertorlugu apeqquteqaammut nr. 105-2020-mut inunnut innarluutilinnut  
suliassaqarfimmut tunngasumut akissuteqaat**

01-07-2020  
Suliap nr 2020 - 10415  
Akt id 14044314

Asasara Laura

Postboks 260  
3900 Nuuk  
Oqarasuaat (+299) 34 50 00  
Naqitanik nassitsigasuaat  
(+299) 34 66 66  
E-mail: iian@nanoq.gl  
www.naalakkersuisut.gl

Apeqqutinnut qujanaq. Apeqqutigineqartut tullinnguuttuni ataasiakkaarlugit  
uteqqinneqarput akineqarlutillu.

**1. Kapitale 12, § 54, imm. 4 naapertorlugu Kommunini inunnit innarluutilinnillu  
sullissisut akornanni ilitersuisoqarnikuua inatsit taanna qanorpiaq  
nassuiaatissartaqarnersoq?**

Pitsaaliuinnermut Isumaginninnermullu Aqutsisoqarfik inunnut innarluutilinnut  
suliassaqarfimmi inatsimmik nutaamik ilinniartitsisartunik angalaaqatigiittartuuteqarput.  
Angalaaqatigiittartut kommuninut ornigullutik ilinniartitsisarput, ilaatigut kommunini sulisut  
angallattarnerat minnerpaaffianiitinniarlugu aamma ilaatigut sumiiffinni sulianik sullissisut  
qaninneruniarlugit. Sulisut kikkut ilinniartitsinnermut peqataassanersut pillugit kommunit  
namminneq toqqaasinnaasarsimapput.

Angalaaqatigiittartut kommunini tallimani tamani illoqarfinni tamani ilinniartitsinissartik  
pileraarutigisimavaat. Ilinniartitsineq 2020-mi aggustip naanerani  
naammassineqarsimassasoq pileraarutaagaluarpoq. COVID-19-inili pissutaalluni  
ilinniartitsinissamut pileraarut allangornikuuvoq. 2020-mi ukiakkut kommunini tamani  
illoqarfinni tamani ilinniartitsisoqarsimassasoq naatsorsuutigineqarpoq.

Angalaaqatigiittartut kommunini ataasiakkaani ulloq ataaseq ilisaritsinnermut  
atorsimavaat, tassani kommunimi aqutsisut sulisullu attuumassuteqarsinnaasut tamarmik  
aggersarneqarsimallutik. Ullunut ilisaritsinnermut atatillugu Angalaaqatigiittartut ulluni  
pingasuni ilinniartitsillutik pikkorissaasimapput, siusinnerusukkut inatsisip massakkullu  
inatsisip tunngaviatigut assigiinngissutaat erseqqissaatigineqarsimallutik.

Pikkorissartut akuutinneqarnissaat aamma sunniuteqaqataanissaat  
Angalaaqatigiittartunit ukkatarineqarsimavoq. Ullut siullit marluk inatsisitigut atortussat  
misissorneqarput. Ullut pingajussaanni suliassaqarfiit aamma inatsimmi  
aalajangersakkat sorliit misissorneqassanersut pikkorissartunit  
kissaatigineqarsinnaasimavoq.

Politiiniit, peqqinnissaqarfimmiit, isumaginninnermik ingerlatsivimmit aamma  
atuarfeqarneq pillugu suliassaqarfimmit peqataasoqarsimavoq. Eqimattat taakku

tamarmik inuit innarluutillit pillugit inatsimmi pisussaaffiligaapput. Inunnut innarluutilinnut suliassaqarfimmi kommunini sulianik sullissisartunut ilitsersuisoqarsimavoq.

Pitsaaliuinermit Isumaginninnermullu Aqutsisoqarfik ilitsersuusiornikuuvoq, tassani inatsimmi allannguutit aamma inatsimmi nutaami aalajangersakkat nutaat arlallit nassuiarneqarput. Ilitsersuut kommuninut tusarniaassutigineqareerpoq aamma kommunit akissutaat tunngavigalugit aaqqinneqarpoq. Inuit innarluutillit pillugit inatsimmut ilitsersuutip inaarutaasup piaartumik tamanut saqqummiunneqarnissaa naatsorsuutigineqarpoq.

Pitsaaliuinermit Isumaginninnermullu Aqutsisoqarfik isumaginninnermit suliassaqarfik pillugu kommuninut ilitsersuinermit suliassaqarpoq. Taamaammat inuit innarluutillit pillugit inatsisip paasineqarnissaa pillugu apeqqutinik Pitsaaliuinermit Isumaginninnermullu Aqutsisoqarfimmut nassiussisoqarnissaanut periarfissaqarpoq. Aammattaaq tamanna suliassaqarfimmi sulisunut pisariaqartoq kommunit isumaqarpata, inatsimmi suliassaqarfiit aalajangersimasut pillugit misissuinissamat / ilinniartinneqarnissamat / siunersiueqatiginissamat ikiorneqarnissaq periarfissaavoq.

Inuit innarluutillit tapersorsorneqarnissaat pillugu inatsisip akuersissutigineqarneranut atatillugu, inatsit, nassuiaatitaa ilaalu ilanngullugit inatsisit.gl-imut ilineqarnikuupput taamaasillunilu tamanit takuneqarsinnaalerlutik. Inatsimmi aalajangersakkat nutaat aamma allanngortitat paasineqarnissaat aamma atorneqarnissaat pillugit itsiliiffigineqarnerat erseqqissaavigineqarnerallu nassuiaatini takuneqarsinnaapput.

Sammissaqartitsinerit aamma neqeroorutit qulaani eqqaaneqartut saniatigut, Sisimiuni inunnut innarluutilinnut nunamut tamarmut sullissivik Pissassarfik timikkut, tarnikkut, oqalunniarnikkut ilisarsisarnikkullu innarluuteqarnermut tunngatillugu sulianut tunngasumik ilitsersuinissamik, siunnersuinissamik, qulaajaanissamik, ilinniartitsinissamik, pikkorissanissamik, katsorsaanissamik aamma sungiusaanermik neqerooruteqartarmat ilisimatitsissutigineqarsinnaavoq.

## **2. Namminersorlutik Oqartussat Kommunillu akornanni inatsit innarluuteqarnermut tunngasoq pillugu pikkorissartitsisoqarnikuua imaluunniit angalatitsisoqarnikuua paatsuuisoqarsinnaajunnaarsillugu?**

Apeqqummut 1-imut akissut innersuussutigineqarpoq.

Inussiarnersumik inuulluaqqusillunga

Martha Abelsen